

Սիրելի հայրենակիցներ,

Այս տարի արտակարգ իրավիճակներով լեցուն տարի մը բոլորեցինք, դիմագրաւելով այնպիսի իրադարձութիւններ, որոնք Կիպրոսի պատմութեան մէջ, 1974-ի դէպքերէն ետք, ամենադժուար տարին կարելի եղաւ համարել թէ տնտեսական եւ թէ քաղաքական առումներով: Քաղաքական գետնի վրայ առ այժմ կը



գտնուինք շատ բարդ հանգրուանի մը մէջ, իսկ Մարտ անսուան դրամատնային համակարգի քայքայումը՝ մեր փոքր կղզին փոխադրեց տնտեսական ճգնաժամի անմեծնավտանգաւոր աստիճանին: Վերջին տուեալներուն համաձայն, անգործութեան համեմատութիւնը կը գերազանցէ 17%, իսկ կացութիւնը բարելաւուելու նշոյլները քիչ մը հեռու կը թուին ըլլալ: Կառավարութիւնը, տքնաջան աշխատանք կը տանի տարբեր ծրագիրներու մշակումով եւ զանազան միջոցներու դիմելով կը փորձէ այս երեւոյթին առաջքը առնել: Զետեւաբար, իւրաքանչիւրէս կը պահանջուի համբերութիւն, լաւատես մօտեցում եւ բարոյապէս տոկունութիւն, որոնք ուշ կամ կանուխ անպայման պիտի առաջնորդեն մեզ դուրս գալու ներկայի անել կացութիւններէն:

Ինչ կը վերաբերի Սուրիոյ իրավիճակին, անցեալ տարւոնէ այս տարի, քաղաքական գետնի վրայ որեւէ փոփոխութիւն չկայ: Հարցը նոյն ձեւով կը շարունակուի եւ Սուրիոյ ապագան կը մնայ անորոշ: Հայ համայնքը կ'ապրի ծանր օրեր եւ տեղւոյն Ազգային Իշխանութիւնն ու միութիւնները, կը փորձեն իրենց կարելիութեան սահմաններէն ներս նիւթական եւ բարոյական օժանդակութիւն տրամադրել տուժողներուն: Յոյսով ենք, որ 2014 տարուան ընթացքին, քաղաքական նոր իրադարձութիւններ կ'արձանագրուին եւ վերջ մը կը դրուի այս անբաղձալի պատերազմին:

Գալով մեր Գրասենեակի գործունէութեան, ինչպէս ձեզմէ շատեր ականատես եղան, Նոյեմբեր 9-ին մեծ յաջողութեամբ իրականացաւ «Ժողովրդական Երգիչ» համոյթի երեկոն, որու մասին մանրամասնօրէն անդրադարձած ենք «Լրատու»ի յաջորդող էջերուն մէջ:

Նոյեմբերի վերջաւորութեան, երկար տարիներու վրայ երկարող աշխատանքներու որպէս արդիւնք, Սլովաքիոյ դեսպանատան նախաձեռնութեամբ եւ Երեսփոխանական Գրասենեակի միացեալ գործակցութեամբ, քաղաքական մակարդակի այցելութիւն մը իրականացաւ Կիպրոսի բռնագրաւեալ շրջանին մէջ գտնուող Սուրբ Մակար վանական համալիր, զգաստութեան ալիք մը ստեղծելով օտար այցելուներուն մօտ, որուն մասին լայնօրէն արձագանգեց տեղական մամուլը: Մանրամասնութիւնները կարդալ «Լրատու»ի 8-րդ էջին վրայ:

Իսկ, Դեկտեմբեր 2-ին, Նիկոսիոյ Համալսարանին UNESCO անպիոնին կազմակերպած «Բազմամշակութային Կիպրոս. Կիպրահայ Համայնքը» նիւթով միջոցառումը, շօշափելի արդիւնք մը տուաւ, երբ ձեռնարկի աւարտին, յայտարարուեցաւ երկու 50% կրթաթոշակներու շնորհումը հայ համայնքի լաւագոյն նորաւարտ աշակերտներու: Այս

մասին անջատ բաժինով նշում կատարած ենք «Լրատու»ի 12-րդ էջին վրայ:

Վերջապես, վերոնշեալ իրագործումները ի մտի ունենալով, կը հաստատենք թէ մեր աշխատանքները կը շարունակուին զանազան ոլորտներէ ներս ու պիտի շարունակուին նոյն թափով, որպէսզի ապահովուի Կիպրահայութեան վերելքն ու յարատեւութիւնը:

Սիրելիներ,

Շնորհաւորելով ձեր բոլորին Նոր Տարին եւ Ս. Ծնունդը, մաղթանքս է, որ 2014 տարին թեւակոխենք նոր տեսլականով, նոր յոյսով եւ նորանոր ծրագիրներով:

Վարդգէս Մահտեսեան

Կիպրահայ Համայնքի Պետական Ներկայացուցիչ

ԵՌԱՄՍԵԱՅ ԳՈՐԾՈՒՆԵՈՒԹԻՒՆ

Կիպրահայ գաղութի կեանքէն

Չորեքշաբթի, 6 Նոյեմբեր 2013-ին, Պետական ներկայացուցիչը ու իր տիկինը յատուկ հրաւեր ստանալով, ներկայ գտնուեցան Լառնաքայի Հայ Ակումբին կազմակերպած «Հայկական Յուշակոթողները Կիպրոսի մէջ» ձեռնարկին, որ տեղի ունեցաւ Լառնաքայի Նարեկ Վարժարանի սրահին մէջ: Բանախօսն էր Պրն. Ալեքսանդր Հաճիլիւրաս:

Կիրակի, 24 Նոյեմբեր 2013-ին, Տէր եւ Տիկին Վարդգէս Մահտեսեաններ ներկայ գտնուեցան Նիկոսիոյ Ս. Աստուածածին Եկեղեցւոյ Անուանակոչութեան տօնին առիթով մատուցուած Ս. Պատարագին եւ մատաղի օրհնութեան արարողութեան:

Չորեքշաբթի, 27 Նոյեմբեր 2013-ին, յատկապէս հրաւիրուելով, Պետական Ներկայացուցիչը եւ իր տիկինը ներկայ գտնուեցան ՀՕՍ-ի «Սօսէ» մասնաճիւղի 25-ամեակի հանդիսութեան, որ տեղի ունեցաւ Նիկոսիոյ Նարեկ Վարժարանի սրահին մէջ:

Չորեքշաբթի, 4 Դեկտեմբեր 2013-ին, Տէր եւ Տիկին Վարդգէս Մահտեսեաններ, ներկայ գտնուեցան Համագ-գայինի «Օշական» մասնաճիւղի «Դիմակ» թատերախումբի ներկայացուցած՝ Յարութ Թահմազեանի բեմադրած, «Սխալ Ուղղութեամբ» զաւեշտին, որ տեղի ունեցաւ Առաջնորդարանի «Վ. Իւթիւճեան» սրահին մէջ:

Կիրակի, 15 Դեկտեմբեր 2013-ին, Տէր եւ Տիկին Վարդգէս Մահտեսեաններ ներկայ գտնուեցան Կիպրահայ Հայատառ Մամուլի Օրկաններու կազմակերպած «Հայատառ Մամուլին Դիմագրաւած Խնդիրները» զրոյց-քննարկումին, նուիրուած Գերաշնորհ Տէր Վարուժան Արքեպիս-

կոպոս Զերկելեանի մամլոյ-հրատարակչական գործունութիւններու 25-ամեակին, որ տեղի ունեցաւ «Վ. Իւթիւճեան» սրահին մէջ, հովանաւորութեամբ Պրն. Վարդգէս Մահտեսեանի:

Չորեքշաբթի, 18 Դեկտեմբեր 2013-ին, Պետական Ներկայացուցիչը ընկերակցութեամբ իր տիկնոջ, ներկայ գրտնուեցաւ Նիկոսիոյ Նարեկ Վարժարանի Մանկապարտէզի եւ Նախապատրաստական դասարաններու Կադանդի հանդէսին, որ տեղի ունեցաւ դպրոցի սրահին մէջ:

Նոյն օրը, Տէր եւ Տիկին Վարդգէս Մահտեսեաններ ներկայ գտնուեցան նաեւ Կոյրերու դպրոցին մէջ տեղի ունեցած Կադանդի հանդէսին:

Պաշտօնական մակարդակի հանդիպումներ եւ ձեռնարկներ

Դինգշաբթի, 17 Դեկտեմբեր 2013-ին, Պրն. Վարդգէս Մահտեսեան յատկապէս հրաւիրուելով, մասնակցեցաւ European People's Party-ի 16-րդ միջ-կրօնական երկխօսութեան խորհրդաժողովին եւ կէսօրուան ճաշկերոյթին, որ տեղի ունեցաւ Նիկոսիոյ «Յիլթըն» պանդոկին մէջ:

Երկուշաբթի, 4 Նոյեմբեր 2013-ին, Պետական Ներկայացուցիչը, խորհրդարանի իր Գրասենեակին մէջ, հանդիպում մը ունեցաւ Սլովաքիոյ դեսպան Ն.Վ. Տիկին Օքսանա Թոմովայի հետ, քննարկելու պաշտօնական եւ քաղաքական մակարդակի վրայ այցելութիւն մը իրականացնելու մանրամասնութիւնները դէպի Կիպրոսի բռնագրաւեալ շրջանին մէջ գտնուող Մակարավանք համալիրը:

Ուրբաթ, 20 Դեկտեմբեր 2013-ին, Պրն. Վարդգէս Մահտեսեան տեսակցութիւն մը ունեցաւ Ներքին Գործոց Նախարարութեան նորանշանակ Ընդհանուր Տնօրէն Պրն. Կոստանդինոս Նիքոլայիտիսին հետ, Կիպրահայ Զամայնքը յուզող հարցերու շուրջ:

«Ժողովրդական Երգիչ» համոյթի աննախընթաց ելոյթ



Շաբաթ, 9 Նոյեմբեր 2013-ին, Ստրովլուսի Քաղաքապետարանի շքեղ հանդիսասրահին մեջ, մեծ յաջողութեամբ տեղի ունեցաւ «Ժողովրդական Երգիչ» մշակութային երեկոն, որուն ներկայ գտնուեցան աւելի քան 850 անհատներ, ծայրէ ծայր լեցնելով սրահը:



Բացման խօսքով ելոյթ ունեցաւ Պրն. Մահտեսեան, որ նշեց, թէ այս ելոյթը տեղի կ'ունենայ Կիպրոսի տնտեսական ամենաճգնաժամային պահերուն եւ որուն իրականացումը, մեզմէ պահանջեց յանդուգն որոշումներ կայացնել կառչած մնալով մեր առաքելութեան եւ սկզբունքներուն:



Հայրենիքէն ժամանած արուեստագէտներն ու երաժիշտները, հայաբոյր զգացմունքով մեկնաբանեցին մեր մշակոյթի ողնաշարը համարուող աշուղական եւ ժողովրդական երգերը, յուզմունք եւ միեւնոյն ժամանակ խանդավառութիւն պարգեւելով ներկաներուն: Երկու ժամ տեւողութեամբ յայտագիրի ընթացքին, Կիպրահայութիւնը ըմբոշխնեց Սայեսթ Նովայի, Աշուղ Շերամի ու Երամի, Աշուղ Աշոտի եւ Հավասիի, ինչպէս նաեւ համոյթի գեղարուեստական ղեկավար եւ թառահար Արտեմ Խաչատուրի յօրինումները, որոնց մեղմ երաժշտութեան տակ ճկունութեամբ ու հաստատական պարեցին Համազգայինի «Սիփան» պարախումբի աղջիկներն ու տղաքը, պարուսոյց Պետրոս Ղարիպեանի գլխաւորութեամբ:

Ելոյթի ակարտին, հանդիսատեսները յագեցած ու գոհունակութեամբ դուրս եկան սրահէն, երախտագիտական խօսքեր յայտնելով Երեսփոխանական Գրասենեակի տարած աշխատանքին:

Երեկոն շարունակուեցաւ Տէր եւ Տիկին Վարդգէս Մահտեսեաններու բնակարանը, ուր հիւրասիրուեցան արուեստագէտները, «Սիփան» պարախումբի եւ Երեսփո-

խանական Գրասենեակի Մշակութային Յանձնախումբի անդամները, հաճելի պահեր անցընելով:

Յաջորդ օրը, անոնք այցելեցին Ս. Աստուածածին Եկեղեցի, ապա Մելգոնեան Կրթական Հաստատութիւն եւ շարունակեցին իրենց համար ծրագրուած միօրեայ պտոյտը դէպի Այյա Նաբայի ծովեզերքը: Յետմիջօրէին, անոնք վերադարձան Հայաստան, Կիպրոսի ու Կիպրահայութեան մասին ամենալաւագոյն յիշատակներով:

Քաղաքական մակարդակի այցելութիւն Սուրբ Մակարավանք



Հինգշաբթի, 28 Նոյեմբեր 2013-ին, նախաձեռնութեամբ Սլովաքիոյ դեսպան Ն.Վ. Տիկին Օքսանա Թոմովայի եւ համագործակցութեամբ Կիպրահայ Համայնքի Պետական Ներկայացուցիչ Պրն. Վարդգէս Մահտեսեանի ու ընկերակցութեամբ Թեմական Ժողովի ատենապետ Պրն. Սե-

պուհ Դաւիթեանի, Սուրբ Մակարավանք այցելութիւն մը իրականացաւ, մասնակցութեամբ Յոյն եւ Թուրք Կիպրական քաղաքական կուսակցութիւններու ներկայացուցիչներուն, զանազան քաղաքական դէմքերու, լրագրողներու եւ հեռատեսիլի կայաններու: Այս այցելութեան նպատակն էր երկխօսութեան նպաստաւոր մթնոլորտ ստեղծելով լուսաբանել կողմերը, պատմամշակութային ժառանգութիւն ներկայացնող վանական համալիրներու ունեցած անփոխարինելի արժէքը համայն Կիպրոսի համար եւ այդ իսկ պատճառով յատուկ հոգածութեան առարկայ դարձնել զանոնք:



Այցելողները, տեսնելով Մակարավանքին անմխիթար վիճակը, ականատեսի աչքերով ու խիստ ազդուած զգացմունքներով արտայայտութիւններ ունեցան ընկերակցող լրագրողներուն եւ հեռատեսիլի կայաններուն, յայտնելով իրենց պատրաստակամութիւնը անվերապահօրէն օժանդակելու Վանքի վերանորոգման ծրագիրներուն:



Ընդգծենք, թե Վանքի մատուռի մուտքին, Պետական Ներկայացուցիչը հակիրճ ձեռով այցելուներուն ներկայացուց Մակարավանքին պատմականը եւ կառոյցին հետ առնչուող վերջին մի քանի տարիներու իրադարձութիւնները: Այցելուներուն նաեւ տրուեցան Մակարավանքին մասին պատրաստուած յատուկ թերթիկ մը, որ կը ներփակէր մանրամասն պատմական տեղեկութիւններ: Ապա, Պրն. Մահտեսեան պատասխանեց իրեն ուղղուած հարցումներուն:

Տեղին է յիշել, որ Մակարավանք այցելութենէն յետոյ, ամբողջ խումբը ուղղուեցաւ Միրթու, ուր կը գտնուի Սուրբ Փանթէլէյնոնի պատմական վանքը, որ դարձեալ կը ներկայացնէ ցաւալի վիճակ մը:

Այս զոյգ պատմական վանական համալիրները տրուած այցելութեան առիթով, հեռատեսիլի կայանները եւ թերթերը լայնօրէն արձագանգեցին:

Յոյսով ենք, որ տարուած աշխատանքներուն շնորհիւ եւ մօտ ատենէն իրականութիւն պիտի դառնայ մեր բոլորին ուխտատեղին համարուող Մակարավանքին վերանորոգումը:

Նիկոսիոյ Համալսարանի կազմակերպած՝
«Բազմամշակութային Կիպրոս.
Կիպրահայ Համայնքը» երեկոն



Երկուշաբթի, 2 Դեկտեմբեր 2013-ին, կազմակերպութեամբ Նիկոսիոյ Համալսարանին UNESCO ամպիոնին, տեղի ունեցաւ պատշաճ միջոցառում մը «Բազմամշակութային Կիպրոս. Կիպրահայ Համայնքը» նիւթով, համալսարանին Cine Studio սրահին մէջ:

Սոյն ձեռնարկին, խօսք առին յաջորդաբար Դոկտ. Էմիլիոս Սոլոմոն, որ Նիկոսիոյ Համալսարանին UNESCO ամպիոնին նախագահն է, Նիկոսիոյ Համալսարանի Բեկտոր Դոկտ. Միխալիս Աթալիտիս, Կիպրահայ Համայնքի Պետական Ներկայացուցիչ Պրն. Վարդգէս Մահտեսեան եւ Կիպրոսի



Հանրապետության Կրօնական Փոքրամասնություններու հարցերով Յանձնակատար Տիկին Քեթի Քլիրիտու: Գեղարուեստական բաժինով ելոյթ ունեցան Համագգայինի «Սիփան» եւ «Նանօր» մանկապատանեկան պարախումբերը, հայրենի պարուսոյց եւ գեղարուեստական ղեկավար Պրն. Պետրոս Ղարիպեանի գլխաւորութեամբ: Ապա, ներկայացուեցաւ «Հայերը Կիպրոսի մէջ» վաւերագրական ժապաւենին ամփոփ տարբերակը, որմէ ետք խօսք առաւ Նարեկ Հայկական Վարժարաններու նախկին տնօրէն Պրն. Վարդան Թաշճեան:

Ձեռնարկը վերջ գտաւ հիւրասիրութեամբ, որ դարձեալ կազմակերպուած էր Նիկոսիոյ Համալսարանին կողմէ:

Կրթաթոշակ

Վերոնշեալ ձեռնարկի աւարտին եւ ի մտի ունենալով կիպրահայ համայնքի ունեցած երկար տարիներու արժէքաւոր ներդրումը Կիպրոսէն ներս, Դոկտ. Սոլոմոն յայտարարեց, թէ Նիկոսիոյ Համալսարանը յետ այսու **2014 տարեշրջանէն սկսեալ, երկու 50% համեմատութեամբ կրթաթոշակներ պիտի տրամադրէ Կիպրահայ կամ Կիպրոսի մէջ մշտական եւ օրինական բնակութիւն հաստատած, ինչպէս նաեւ բարձրագոյն միջեր ունեցող նոր շրջանաւարտ աշակերտներու:**

Տեղեկացնենք, թէ արդէն իսկ ստացած ենք անհրաժեշտ դիմումնագիրները այս կրթաթոշակներուն առնչութեամբ եւ փափաքող ու պայմանները ամբողջացնող աշակերտները կրնան անձամբ դիմել Երեսփոխանական Գրասենեակ, ստանալու յաւելեալ տեղեկութիւններ եւ կամ հեռաձայնել 22-454540 թիւին, ամէն օր, բացի Շաբաթ եւ Կիրակի օրերէն, ժամը 08:30–16:30 միջեւ: Դիմումնագիրները Գրասենեակ յանձնելու վերջնական ժամկէտ՝ 31 Յուլիս 2013:

Շնորհաւորագիր



22 Հոկտեմբեր 2013 թուակիր նամակով մը, Պետական Ներկայացուցիչը շնորհաւորեց Տէր եւ Տիկին Յարութիւն Աննահունին, որպէս օրինակելի հայ ազգի զաւակներ, բարձր գնահատելով անոնց պատրաստակամութիւնը Մայր Հայրենիքի եւ Ղարաբաղի հզօրացման ու բարգաւաճման ի նպաստ կատարած նուիրատուութեան համար:

Նուիրատուութիւնը յանձնելու արարողութիւնը տեղի ունեցաւ Ազգային Առաջնորդարանի հիւրասենեակին մէջ, ներկայութեամբ Հայաստանի Հանրապետութեան Արտակարգ ու Լիազօր դեսպան Ն.Վ. Գազիկ Ղալաչեանի, Թեմիս Կաթողիկոսական Փոխանորդ Վարուժան Արքեպիսկոպոս Հերկելեանի եւ Կիպրահայ Համայնքի Պետական Ներկայացուցիչ Պրն. Վարդգէս Մահտեսեանի:

Ցաւակցագիր

Երկուշաբթի, 18 Նոյեմբեր 2013ին, Կիպրոսի Հանրապետութեան Նախկին Նախագահ Ղաֆկոս Քլիրիտիսի մահուան տխուր առիթով, Պետական Ներկայացուցիչը իր

ու Կիպրահայ գաղութի անունով, ցաւակցագիրներ յղեց հանգուցեալին դստեր եւ Կիպրոսի Կրօնական Փոքրամասնութիւններու գծով յանձնակատար Տիկին Քէթի Քլիրիտուին եւ ՏԻՍԻ կուսակցութեան նախագահ Պրն. Աւերոֆ Նեոֆիտուիին: Պրն. Մահտեսեան իր խոր վիշտը յայտնելով ընդգծեց, թէ անոր մահով Կիպրոսը կորսնցուց պատմական առաջնորդ մը, իսկ Հելլենիզմը՝ նշանաւոր անձնաւորութիւն մը:

Նշենք, թէ նոյն օրը առաւօտեան, Պետական Ներկայացուցիչը այցելելով Նախագահական պալատ, իր արձանագրութիւնը ձգեց այս առիթով յատուկ բացուած տոնարին մէջ, իսկ Երեքշաբթի, 19 Նոյեմբեր 2013-ին, անձամբ ներկայ գտնուեցաւ Ղլաֆկոս Քլիրիտիսի թաղման արարողութեան:

Այցելութիւն «Գալայճեան» Հանգստեան Տուն



Շաբաթ, 14 Դեկտեմբեր 2013-ին, Տէր եւ Տիկին Վարդգէս Մահտեսեաններ, ընկերակցութեամբ Թեմիս Կաթողիկոսական Փոխանորդ Վարուժան Արք. Հերկելեանի, այցե-

լեցին «Գալայճեան» Հանգստեան Տուն եւ Ամանորեայ ու Ս. Ծննդեան լաւագոյն մաղթանքներով եւ անհատական նուէրներով պատուեցին մեր տարեց հայրերն ու մայրերը:

«Նանօր» Մանկապատանեկան Պարախումբ



Շաբաթ, 21 Դեկտեմբեր 2013-ին, Նարեկ Վարժարանէն ներս տեղի ունեցաւ աւանդական դարձած «Նանօր» մանկապատանեկան պարախումբի Նոր Տարուայ եւ Ս. Ծնունդի առիթով կազմակերպուած հաւաքոյթը: Փոքրիկները հաճելի պահեր անցուցին ներկայութեամբ Պետական Ներկայացուցիչին ու ծնողներուն: Պրն. Մահտեսեան խօսք առնելով, շնորհակալութիւն յայտնեց երեխաներուն, անոնց հետեւողական մասնակցութեան համար: Շարունակելով իր խօսքը, Պետական Ներկայացուցիչը իր շնորհակալութիւնը յայտնեց նաեւ վաստակաւոր պարուսոյց Պրն. Պետրոս Ղարիպեանին, անոր ցուցաբերած համբերութեան ու զոհողութեան համար: Ապա, տեղի ունեցաւ կաղանդչեփի բաշխում, որմէ ետք պարախումբի անդամները գոհունակութեամբ մեկնեցան սրահէն:

Վարդգես եւ Մակի Մահտեսեաններ

Կը շնորհաւորեն համայն հայութիւնը
Ամանորի եւ Ս. Ծնունդի
գոյգ տօներուն առիթով՝
մաղթելով Կիպրոսին եւ
մեր Մայր Հայրենիքին
բարգաւաճում եւ հիմնախնդիրներու
բարւոք լուծում

ԿԻՊՐԱՀԱՅ ՀԱՄԱՅՆՔԻ ՊԵՏԱԿԱՆ ՆԵՐԿԱՅԱՑՈՒՑԻՉԻ ԳՐԱՍԵՆԵԱԿ

Քաղաքական Գրասենեակ

9B & C Kastorias Street, Ayia Paraskevi, 2002 Strovolos
Յեռախօս 22- 45 45 40, Յեռատիպ 22- 42 46 42
Ել. Հասցէ office@armenianmp.com
Կայքէջ՝ <http://www.armenianmp.com>

Խորհրդարանական Գրասենեակ

Office Δ-2-2, House of Representatives, 1402 Nicosia
Յեռախօս 22- 40 72 02, Յեռատիպ 22- 40 74 42
Ել. Հասցէ vmahdessian@parliament.cy